

Beralihlah kepada harapan yang pasti
MalaysiaKini.com
March 9,2012
Dr Ghazali Hasbullah

Permohonan maaf secara terbuka Perdana Menteri Datuk Seri Najib Razak mempunyai kesan yang tersendiri dari sudut psikologi. Permohonan maaf secara terbuka ini dengan sendirinya mengakui rekod buruk sepanjang lebih 50 tahun memerintah Malaysia.

Akhirnya Umno/BN tergapai-gapai mencari kaedah baru bagi menyelamatkan diri dan memancing hati rakyat- Maaf kepada seluruh rakyat Malaysia.

Kaedah psikologi ini mudah termakan oleh golongan yang lemah, berfikiran pendek dan meminta-minta. Walau apa kesalahan seseorang, melalui kaedah ini mereka mudah mempengaruhi manusia, akhirnya memaafkan dengan sekelip mata.

Tanpa kita sedar bahawa kesan jangka panjang yang akan menimpa kita, jika terus memberi mandat kepada Umno/BN untuk memerintah Malaysia, mereka akan terus mengulangi siri kezaliman terhadap rakyat.

Rayuan maaf psikologi ini adalah kemuncak kepada taktik memancing undi Umno/BN.

Bagi golongan yang ada integriti, berfikiran panjang dan tidak bergantung kepada orang lain, mereka sudah kenal jerat yang dipasang melalui rayuan psikologi ini.

Minda kita masih bugar mengingati peristiwa setiap kali selepas pilihan raya umum, golongan yang dilabel pembangkang sebagai penjawat awam akan ditukar tempat kerja, disekat segala bentuk bantuan yang mereka layak, malah ada yang diberhentikan terus pekerjaan.

Tidak kurang juga ramai antara rakyat yang dilabel sebagai pembangkang ini terpaksa menjual harta dan mencari kehidupan baru di negara lain kerana tidak tahan dengan tekanan yang diberikan.

Percayalah rayuan maaf psikologi ini akan bertukar menjadi sifat sediakala jika terus diberi mandat kepada Umno/BN dalam pilihan raya umum ke-13 nanti.

Beralihlah ke harapan yang pasti dengan mengundi Pakatan Rakyat.

Copyright © 1999-2012 Mkini Dotcom Sdn. Bhd
<http://www.malaysiakini.com/news/191638>